

Vischnaunca da Mustér



Sboz dils 17.02.2012

Regulativ per il persunal communal

Art. 1 Camp d'applicaziun

Quei regulativ regla igl engaschament, las obligaziuns ed ils dretgs dils collaboraturs dalla vischnaunca da Mustér.

Art. 2 Dretg subsidiar

Nua che prescripziuns specialas stipuleschan buc expressivamein enzatgei auter, vala la legislaziun da personal dil cantun Grischun e las prescripziuns dall'ordinaziun davart la salarisaziun dils scolasts. Per singulas categorias da collaboraturs resta la legislaziun cantunala e federala resalvada.

Art. 3 Relaziun da survetsch

¹La relaziun da lavur vegn francada cun in contract tenor il dretg public.

²El contract da lavur eis ei en cass motivai pusseivel da stipular reglamentaziuns che svarieschan da quest regulativ.

Art. 4 Cumpetenzas

¹Tut ils collaboraturs permanents vegnan engaschai dalla suprastonza communal, il personal d'instrucziun ed il meinascola dil cussegl da scola.

²Emprendists e substituts vegnan engaschai dalla direcziun communal tenor las disposiziuns legalas valeivlas. L'indemnisaziun vegn fixada individualmein en in contract.

Art. 5 Salarisaziun e classificaziun

¹La suprastonza communal classifiescha las plazzas en las classas da funcziun tenor in plan da classificaziun. Quei plan sebase sin la scala da pagas dil cantun Grischun. Per ils scolasts vala l'ordinaziun davart la salarisaziun dallas persunas d'instrucziun dil cantun Grischun.

²Tier la fixaziun dalla paga sebase la suprastonza communal sin la scala da pagas dil cantun Grischun. Enteifer las classas da paga sa la suprastonza communal applicar il sistem cantunal ni il sistem da scalems.

³Sin fundament dil giudicament dils collaboraturs sa la suprastonza communal conceder ina midada dalla classa resp. dil scalem da paga.

Art. 6 Classas e categorias da pagas

¹Sche la situaziun economica ni las finanzas communalas pretendan, sa la suprastonza communal ordinar per tuts collaboraturs ina bloccada digl alzament dallas pagas.

²Malgrad ina bloccada generala digl alzament dallas pagas sa la suprastonza communal en cass specials tuttina conceder in augment dalla classa resp. dil scalem da paga.

Art. 7 Renconuschientscha per prestaziuns extraordinarias

La suprastonza communal sa conceder per prestaziuns extraordinarias e sin fundament d'in giudicament persunal ina renconuschientscha. La cumponenta da prestaziun munta maximalmein 5 % dalla paga da basa corrispundenta dil collaboratur.

Art. 8 Sururas

¹Sco sururas valan per regla mo uras da lavur che vegnan ordinadas dallas autoritads superiuras ordeifer il temps da manaschi regular ni duront ils dis libers. Sururas ein da principi da cumpensar. In'indemnisaziun finanziaria dallas sururas ei pusseivla mo en cass excepziunals.

²Per collaboraturs da cader vegnan las sururas buca indemnisadas. La suprastonza communal sa en cass excepziunals conceder ina renconuschientscha conform ad art. 7.

Art. 9 Obligaziun da domicil

Ei vegn giavischau ch'il personal communal prenda domicil en vischnaunca.

Art. 10 Vestgadira da survetsch e da protecziun

La suprastonza communal regla il dretg dils collaboraturs per vestgadira da survetsch e protecziun.

Art. 11 Indemnisaziun dallas spesas

¹L'indemnisaziun dallas spesas (inclusiv viadis) sedrezza tenor la reglamentaziun cantunala.

²La suprastonza communal regla l'indemnisaziun per il diever da vehichels duront la lavur.

Art. 12 Camp d'applicaziun ed indemnisaziun dalla lavur

Il camp d'applicaziun e l'indemnisaziun da personal accessori regla la suprastonza communal.

Art. 13 Ulteriuras cumpetenzas

Aschinavon che quest regulativ fixescha nuot auter, ei la suprastonza communal l'istanza che decida definitivamein davart damondas da dretg dil persunal.

Art. 14 Contestabladad da decisiuns da dretg dil persunal

Decisiuns da dretg dil persunal vegnan decididas dalla suprastonza communal en davosa istanza, exceptiu il cass ch'igl ei previu da recuorer alla Dertgira administrativa.

Art. 15 Activitads accessorias ed uffecis publicis

¹Activitads accessorias astgan buca impedir d'ademplier las obligaziuns prescrettas el contract da lavur.

²L'execuziun d'ina activitad accessoria d'interess public sco era occupaziuns accessorias pagadas, per las qualas ei vegn impundiu ordeifer la lavur mintg'jamna dapli che quater uras, drovan l'autorisaziun dalla suprastanza communal, resp. dil cussegl da scola.

³Sch'ina activitad accessoria coincida cul temps da lavur, eis ei da cumpensar quei temps ni da reducir il pensum da lavur.

⁴Uffecis publicis ni mandats da tuttas sorts che savessen collidar cun ils interess dalla vischnaunca ni restrenscher la prestaziun da lavur, drovan il consentiment dalla suprastanza communal, resp. pil personal d'instrucziun e pil meinascola dil cussegl da scola. La damonda corrispundenta ei da far avon che surprendre talas funcziuns.

Art. 16 Obligaziun alla discreziun

¹Tuts collaboratur ein obligai a discreziun pertuccont ils fatgs confidai ni surdai ad els en lur uffeci ni survetsch e ch'ei per motivs ufficials ni privats superiurs buca destinai per tiarzas personas. La discreziun vala era suenter che la relaziun da lavur ei dissolvida.

²Tuts documents surdai ad in collaboratur duront sia activitad per la vischnaunca ni elaborai dad el duront quei temps s'audan alla vischnaunca e restan suenter la fin dalla relaziun da lavur en possess da quella.

Art. 17 Reglamentaziuns divergentas dil dretg cantunal

Las suandontas prescripziuns dalla lescha da personal (LP) e l'ordinaziun da personal dil cantun Grischun (OP) valan buca per la vischnaunca:

- Art. 31 LP Fond d'assistenza per il personal
- Art. 39 LP Prevenziun professiunala
- Art. 53 Domicil, habitaziun da survetsch
- Art. 61 + 62 LP Cumissiun dil personal: Incumbensas, cumposiziun ed elecziun
- Art. 63 - 68 LP Cumpetenzas, protecziun giuridica e procedura
- Art. 69 + 70 LP Camp d'applicaziun/Indemnisaziun da lavur
- Art. 24 OP Fond d'assistenza per il personal
- Art. 42 OP Premias, prestaziuns d'assicuranza ed inhabilitad da luvrar
- Art. 44 OP Cassa da pensiun: Repartiziun dallas contribuziuns
- Art. 44a OP Extensiun dil plan da prevenziun
- Art. 44b OP Capital en cass da mort
- Art. 45 OP Indemnisaziun da partenza

Art. 18 Vigur

Quest regulativ entra retroactivamein en vigur igl emprem da schaner 2012 e remplazza il regulativ da salarisaziun dalla vischnaunca da Mustér digl emprem da schaner 1999, revedius 2005.

Approbau dil cussegl da vischnaunca ils

Il president communal:
Dr. Dumeni Columberg

Il canzlist communal:
Andri Hendry

Plan da plazzas dalla vischnaunca

| <u>Classificaziun</u> | <u>Procent plazzas</u> |
|---|------------------------|
| Menader (cader) - canzlist - menader uffeci da baghegiar - menader menaschi tecnic/forester | 300% |
| Emploiau mercantil | 350% |
| Meinagruppa - causerenera - menaschi tecnic | 200% |
| Collaboratur dil menaschi tecnic | 700% |
| Pedel | 135% |
| Meinascola (incl. secretariat) | 50 - 70 % |
| Persunal d'instrucziun | |
| Scoletta | 150 - 200 % |
| Scalem primar (incl. persunal CPI) | 640 - 700 % |
| Scalem superiur | 550 - 600 % |
| Scola da lavur e tenercasa | 100 - 150 % |

Il plan da plazzas munta ina part integrala dil preventiv annual.